

մաքրել: Եւ յորժամ փէշքէշ տալ գնացաք զայմա-
խամին, յետ ելանելոյ ի դուրս՝ քէհեա սուլթանին
կայր ի պատրաստի և նստէր, և արգիլեաց զվարդա-
պետն և բազում աղերսանս ասաց թէ Զայն առնիցէ
վասն մեր, ասէ, և վասն հայցուածոց սուլթանին:
Եւ պատասխանեաց վարդապետն թէ վասն զրամի է՝
բաշխեցից, և վասն օրինաց է՝ կարող չեմ այգմ: Եւ
նա ասէ. Տաճկացնեմ և առնեմ զայդ. և ասէ վար-
դապետն. Այդմ ո՞ր կարող է ասել ինչ: Եւ նա շար-
ժեալ ի բարկութիւն անգոսնեաց և անարգանօք յետս
դարձոյց, և եկաք ի տեղի մեր: Եւ նոքա պատրաս-
տէին զհարսանիսն, և կարծեալ թէ զիջուցեն և կամ
բռնութեամբ հրամայել տացեն ի ձեռն բռնակալաց:
Յետ աւուրց ինչ ապա եկին եէնկիչէրիք և օտապա-
շիք խնդրելով զայն: Եւ ես զգուլիմ յերկարեւն, այն-
քան թէ՝ Մեք զհարսանիսն առնեմք, դու յեկեղեցին
բան մի՛ ասեր նոցա: Եւ ասէ վարդապետն. Բան և
գործ մեր այդ է առաւել, չարեացն չար ասել և
բարեացն՝ բարի: Եւ այսու ոչ կարացին, և ելեալ գնա-
ցին. այլ ունէին միտս զի գտեալ երէց մի բռնութեամբ
եէնկիչէրոցն պսակ դիցեն: Եւ ի Կիրակի աւուրս յՈւ-
կիւտար էաք, և կրկին գերիցունս ի տունս նոցա ա-
ռաքեաց խրատել, զի ասէին յայսմ աւուր լինել հար-
սանեաց նոցա: Եւ անտի ևս զիր առաքեաց առ Այ-
վատի որդի՝ օրհնութեամբ խրատս և պատուէր օրի-
նաց և հայրապետաց, նաև յանիծից զգուշացոյց բա-
զումս, և ասաց. Որդեա՛կ իմ, Աստուած վկայ և քա-
հանայքս ամենայն, զի եթէ ըստ օրինի գնացես՝ ոչ
առնելով զվատթարութիւնդ. հրաժարեա՛ այտի, և զո-
րում դուստր կամիս՝ առնել տամ քեզ և ես կնքա-
հայր լիցիմ քեզ. դու գիտես, այսուհետև անպարտ
եմ և այսու թղթիւ առաջի Քրիստոսի մտանելոց եմ
ընդ քեզ: Եւ այսու ևս ոչ եղև, այլ բերեն պատգամ